



www.allschwiler-fasnacht.ch

## Prolog Blaggedde 2025

**Motto: «Goots eigentlich no?»**

S 8er-Dramm, plagiert me grooss,  
faart bald au duur d Binnigerstrooss.  
Allschwil e Dorf, das chasch vergässe,  
mit groosse Elle wird hützudaags gmässe.

«Stadtentwigglig» duet sich das nenne,  
an dr Ruumbaanig isch das z erchenne.  
So blaant dr Kanton, mir finde das doof,  
e Drammschlaufe bim Schuelhuus Gaarteheof

Die Gleisverlängerig isch für d Chatz,  
me opferet drfür dr letschi Blatz.  
Anstatt dass d Schuelchinder iiri Flause,  
dört usstobe chönne in der Pause,  
stöön uf däre Matte, das muesch gsee,  
bald scho d 8er-Dramm vo dr BVB.

Glychzeitig will me die ganzi Binnigerstrooss,  
in e Flaniermeile umbaue und zwar grooss.  
Mit schöne Erhooligsinsle und chleine Oaase,  
Hünd und Schooff chönne denn druff graase.

E «Mitwirggigsverfaare» duet me starte,  
aber mitere Volggsbefroogig will me warte,  
denn e Roorkrepiere chönnt das gää,  
das Risiko will niemer uff sich nää.  
Me blaant bewusst am Volgg verbyy,  
das isch die hüttigi Manager-Strategii.

Mit em Fasnachtsmotto 2025 frooge mir eifach soo,  
denn das Bolit-Buebedriggli chönne mir nit verstoo.  
So zeigt unseri dissjörigi Fasnachtsblaggedde,  
die Bieridee als Baloon, muesch nit verschregge.  
Nur heissi Luft dien d Blaaner produziere,  
ei Stich in Baloon, denn duet dä expoldiere.  
Und alli Studie sind für d Chatz,  
nämmet s Bispil am Lindeblatt.

Was mir dien fordere mit unserer ganze Chraft,  
e Abstimmig bi dr Allschwiler Ywoonerschaft.  
Wänn mir die Gleisverlängerig oder nit,  
das isch unserei grossi Bitt.  
Denn gseet me wo s Pändel aneschloot,  
mit JO oder NEI wies wytergoot.

Die Gleisverlängerig dien mir, salli Digge,  
denn ändgültig in d Wieschti schigge.  
Und s 8er-Dramm, mir wänn jetz ände,  
wird witerhin bim Weierhoof wände.

d Chrutstorze  
Wildviertel-Clique Allschwil